

Ruth Schmitt
Alles for die Katz

Es war 1958 in unserm alte Haus:
Korz vor Niggelaus suchte ich die Backrezepte raus -
saa zu dem Paul - der war ganz Ohr:
"Ich nemm mer jetz des Plätzjebacke vor.

Am Owend, wann de Lade zu,
hab ich do defor Zeit unn Ruh."
De Paul seet: "Do wär ich awwer gern debei -
wart bis am Mittwoch - do hab ich frei.

Ich bereit schun vor am Noomittach:
Ich knack der die Niss unn mahl se aach.
Ich kennt de Deich schun dichtig rühre
unn gewissenhaft die Backblech schmiere.

Glaab mer, mei lieb Schätzche Ruth:
Die Arwet mach ich gern unn gut!
Soll des Backe gut gelinge,
muss ich de Kücheherd noch uff Vordermann bringe.

Des Oferohr butz ich noch aus,
hole Holz unn Bricketts ins Haus."
Unsern Küche-Kohleherd
war beim Plätzjerbacke Goldes wert.

Am Mittwoch war es dann so weit,
alles war gut vorbereitet:
Buttergebackenes, Nußmakrone,
Zimtsterne mit Guss aus Zitrone,

Anisplätzjer unn Mandelbrot,
Herzcher mit Liebesperle, grie unn rot:
mein hilfsbereite Zuckerbäcker
war de beschte Plätzjerschmecker.

Es hot so richtig Spaß gemacht -
im Handumdrehe war tiefe Nacht.
Des letschte Blech noch aus em Ofen,
dann war es awwer Zeit zum Schlofe.

Die gute Plätzjer ware jetzt
in erer Babbdeckelschachtel uffgesetzt,
stande mitte uffem Disch -
aromatisch, knusprig, ofefrisch!

Fertig mit Backe - ach, wie schade -
alle warn se gut gerate.
Doch was war das - ich hatt mich net geirrt:
do draus im Höfche hot's jo geklirrt!

Ich renn aus de Deer, bin total geblennt -
rufe laut: "Paul, es brennt - ES BRENNT!"
En Babiersack, in dem Flasche ware
(mer wollte se dags druff zum Schuttplatz fahre),

der stand lichterloh in Flamme,
fiel mit lautem Knall zesamme!
Des Bohnerdich, das uff de Laater hing,
aach dezu noch Feier fing.

Voll mit Wachs – es war kaa Wunner –
brannte der Lappe grad wie Zunner!
De Paul mit seine bloße Händ
machte dem Feuerzauber schnell e End.

Mutig, flink unn sehr beherzt
hot er die Flamme ausgemerzt.
Bei dem ganze Missgeschick
hatte mer noch e Rieseglück!

Denn ganz in de Näh debei stande noch, wisst er,
des Motorrad unn - voll mit Benzin - en Kanister.
Hätte die Flamme das aach berührt,
das ganze Höfche wär explodiert!

So kame mer awwer zu der mitternächtliche Stunn
noch emol mit dem Schrecke devun.
De Paul der musste jetz gleich recherchiere:
wieso konnte das nor passiere?

De Äschekaschte - unn das war vekehrt -
hatte mer zwaamol während dem Backe ausgeleert.
In en Zinkaamer die Äsch - net ganz kalt -
so e Bröckelche Glu hot noch viel Gewalt...

Dorch en Luftzug en Funke is uffgesprüht -
der ausgerechent uff den Babiersack fliet!
Dort sitzt er jetz unn glimmt und glimmt,
bis der Sack zum Brenne kimmt.

So unn net annerscht isses gewes,
so kams zu der nächtliche Überraschung, der bees.
Awwer mit großer Umsicht unn Bedacht
war alles gelöscht unn nass gemacht.

Zurück in de Küch mein Mage sich dreht:
mit vier Pote die Katz in de Gebäckkischt steht!
Dut zu unserm weitere Schrecke
mit ihrer Mäuseschnut Plätzjer kaue unn schlecke.

Das Weihnachtsguts, das konnte mer vergesse
kaaner wollte es jetz meh esse.
Awwer de Paul - en Freund vun Katze -
will vor lauter Lache fascht platze.

Seet zu mir: "Mein lieber Schatz:
Das war jetz alles for die Katz!
Awwer liewer de Katz die Plätzjer gegönnt,
als dass des Haus wär abgebrennt!"

Unn unser Katz - es war e schwarz -
die hockte uff ehre Lieblingsplatz,
hot sich genüsslich de Schnorres gebutzt,
obwohl ich se geschännt un zurechtgestutzt -

hot schnurrend aus ihre Aeschlitze geschielt
unn sich kaa bißche schuldig gefiehl!
Endlich war jetz Ruh im Haus,
awwer die Geschichte is noch net aus:

Am nächschte Mojend - ganz früh war ich wach -
sinniere üwwer den vertrackte vergangene Daach -
trotz bestandener Feuerprobe
in mir heftige Gewissensbisse tobe:

Ja horch emo, du liewer Himmel -
was war dann das jetz for e Gebimmmel?
"Mensch Paul, das war die Ladeschell!"
weck ich heftig mein Bettgesell.

Im schloofdolle Kopp hot der sich beschwert:
"Och Madche, du host Gespenster geheert!"
Awwer ich hatte die Ohre gespitzt,
im Nachthemd bin ich die Trepp erunnergeflitzt,

kumm in de Lade, unn jetz kimmt de Knuller:
steht vor de Thek de Wilhelm Muller:
"Ei Ruth, wo bleibsten" seet er mit e bije Vedruss
"mach, geb mer Zigarette - ich muss jo zum Bus!"

Jetzt war ich total vun de Socke,
musste mich erscht emol e bisje hocke.
Ich hatte in dere Horrornacht
die Ladedeer uwwerhaupt net zugemacht!

Dorch die Turbulenze gings vegess -
awwer en Schutzengel is bei uns gewes,
hot uns behut unn gut bewacht,
vor Unheil bewahrt, ganz leis unn sacht.

Platzjer hab ich in dem Jahr awwer nemmeh gemacht....